

## **BASES REGULADORAS PARA A CONCESIÓN DE SUBVENCIONES A CLUBS DEPORTIVOS DA PROVINCIA DE PONTEVEDRA QUE PARTICIPAN EN COMPETICIÓN OFICIAIS DE ÁMBITO ESTATAL NO ANO 2026**

O deporte é unha actividade esencial, enriquecedora e xeradora de benestar tanto persoal coma social. Neste sentido, constitúe un importante instrumento de cohesión, de transmisión de valores e de impulso económico.

O modelo deportivo está en continua evolución, con cambios acelerados que incrementan a práctica deportiva entre a cidadanía e potencian a súa proxección social. Neste contexto, resulta fundamental facilitar o acceso ao deporte e fomentar a participación en competicións organizadas polas federacións deportivas.

A Deputación de Pontevedra, consciente das dificultades que teñen os clubs da provincia para participar e representar esta nas diferentes competicións estatais, e ao estar comprometida co labor que levan a cabo no fomento e impulso neste campo, quere promover, a través desta liña de axudas, a participación en competicións oficiais de ámbito estatal por parte dos clubs da provincia de Pontevedra como unha actuación de interese público e provincial que constitúe un factor esencial no desenvolvemento deportivo e que supón un estímulo para fomentar o deporte de base, ademais de cumprir unha función representativa e de reputación xeral do deporte na provincia.

Desde o punto de vista competencial, no artigo 43.3 da Constitución española establécese que os poderes públicos fomentarán a educación física e o deporte como principio reitor da política económica e social.

Na Lei 39/2022, de 30 de decembro, do deporte, considéranse que este e a actividade física son actividades esenciais, e recoñécese o dereito de todas as persoas á súa práctica. Ademais, resáltase a importancia das entidades locais na promoción e fomento da actividade deportiva como xestoras do territorio.

Na Lei 3/2012, de 2 de abril, do deporte de Galicia, establécese que as deputacións exercerán competencias no seu ámbito territorial para fomentar, promover e difundir o deporte.



No ámbito provincial, no artigo 36.1.d da Lei 7/1985, de 2 de abril, reguladora das bases do réxime local, atribúeselle á Deputación a competencia propia de cooperar no fomento do desenvolvemento económico e social e na planificación territorial, en coordinación coas demais administracións públicas.

Do mesmo xeito, no artigo 109.1.d da Lei 5/1997, de 22 de xullo, de Administración local de Galicia, recóllense como competencias propias das deputacións o fomento e a administración dos intereses peculiares da provincia, mentres que no artigo 118.d inclúese a organización de actividades dirixidas ao fomento da cultura, da educación e do deporte.

En virtude do exposto e ao abeiro da Lei 38/2003, de 17 de novembro, xeral de subvencións (LXS); da Lei 39/2015, de 1 de outubro, do procedemento administrativo común das administracións públicas (LPACAP); da Ordenanza reguladora de subvencións da Deputación de Pontevedra e da normativa aplicable, convócase esta liña de subvencións para clubs deportivos da provincia de Pontevedra que participan en competicións de ámbito estatal no ano 2026, de acordo coas seguintes

## **BASES**

### **Primeira. Obxecto**

Estas bases teñen por obxecto regular o procedemento de concesión das subvencións a clubs deportivos da provincia de Pontevedra que participen con algún equipo e/ou deportistas en competicións oficiais de ámbito estatal recollidas nesta normativa. A finalidade destas axudas é colaborar no financiamento dos gastos derivados da súa actividade nas competicións oficiais durante a tempada partida 2025-2026 ou durante a tempada 2026.

### **Segunda. Entidades beneficiarias**

Poderán adquirir a condición de beneficiarias os clubs deportivos sen ánimo de lucro, legalmente constituídos, con domicilio fiscal na provincia de Pontevedra e que conten cun equipo inscrito nalgunha das competicións oficiais de ámbito estatal establecidas ou participen con algún equipo ou deportista en categoría absoluta nas diferentes competicións oficiais dese ámbito e cumpran os requisitos que se establecen na base quinta.



Non poderán obter a condición de beneficiarias as entidades nas que conorra algunha das circunstancias previstas no artigo 13 da Lei 38/2003, de 17 de novembro, xeral de subvencións, así como nas disposicións concordantes da normativa autonómica de aplicación. Tampouco poderán resultar beneficiarias aquelas entidades que teñan pendente de xustificar, con prazo vencido, axudas concedidas no exercicio anterior no marco do mesmo programa.

### **Terceira. Financiamento**

A concesión das subvencións estará suxeita á dispoñibilidade orzamentaria e convocarase con cargo á aplicación 26/340.3410.489.20 do Orzamento da Deputación para o ano 2026 por un importe total dun millón de euros (1.000.000 €).

Esta cantidade poderase incrementar nun máximo dun 25 % do importe total, de acordo coas circunstancias previstas no artigo 58.2 do Regulamento da LXS, aprobado polo Real decreto 887/2006, de 21 de xullo, e no 31 da Lei 9/2007, de 13 de xuño, de subvencións de Galicia (LSG).

O importe deste aumento dependerá dunha xeración, ampliación ou incorporación de crédito. A efectividade da contía adicional queda condicionada á declaración de dispoñibilidade do crédito como consecuencia das circunstancias antes sinaladas e, no seu caso, á aprobación da modificación orzamentaria que proceda, nun momento anterior á resolución da concesión da subvención. Este incremento deberá publicarse antes da resolución de concesión nos mesmos medios que a convocatoria e indicaranse o crédito final dispoñible e a distribución definitiva. Este anuncio non implicará a apertura de prazo para presentar novas solicitudes nin o inicio de novo cómputo de prazo para resolver.

En ningún caso a suma total das axudas concedidas poderá superar o orzamento máximo previsto nestas bases ou, de ser o caso, nas súas posibles modificacións.



#### Cuarta. Réxime xurídico

As subvencións reguladas nestas bases tramitaranse en réxime de concorrencia competitiva, de conformidade cos principios de publicidade, transparencia, obxectividade, igualdade e non discriminación, eficacia no cumprimento dos obxectivos fixados e eficiencia na asignación e utilización dos recursos públicos.

O procedemento rexerese por estas bases e pola normativa básica estatal en materia de subvencións, pola normativa autonómica de subvencións de Galicia, pola Ordenanza xeral de subvencións da Deputación de Pontevedra vixente e pola normativa xeral de procedemento administrativo e réxime xurídico do sector público.

En todo o non previsto nas normas anteriores aplicaranse de forma supletoria as restantes disposicións do ordenamento xurídico que resulten pertinentes segundo a natureza das actuacións.

#### Quinta. Modalidades deportivas e competicións oficiais obxecto de subvención

As modalidades deportivas e competicións oficiais obxecto de subvención clasifícanse, para os efectos destas bases, da seguinte forma:

- Competicións de nivel 1:
  - Modalidades deportivas nas que a competición de categoría absoluta ou sénior se establece en formato de liga por equipos (con 5 ou máis deportistas no espazo de competición).
  - Con xornadas de ida e volta.
  - Con ascensos e descensos de nivel segundo o regulamento de competición.

(\*Inclúese a categoría previa á absoluta na modalidade de fútbol)

Nivel 1-A	
Baloncesto	Primeira FEB e Liga Feminina Challenge
Fútbol	2.ª RFEF feminina
Fútbol sala	2.ª División Nacional masculina
Hóckey sobre patíns	OK Liga feminina e masculina
Rugby	División de Honra masculina
Voleibol	Superliga feminina e masculina



Nivel 1-B	
Baloncesto	Segunda FEB e Liga Feminina 2
Balonmán	División de Prata masculina e División de Honra Ouro feminino
Fútbol	3.ª RFEF masculina e feminina
Fútbol sala	2.ª División Nacional B masculina e 2.ª División Nacional feminina
Hóckey sobre patíns	OK Liga Prata feminina e masculina
Béisbol	Liga Nacional de Béisbol División de Honra Ouro
Sóftbol	Liga Nacional de Sóftbol División de Honra Ouro
Rugby	División de Honra feminina e División de Honra elite masculina
Voleibol	Superliga 2 feminina e masculina
Wáter-polo	División de Honra feminina e masculina

Nivel 1-C	
Baloncesto	Terceira FEB e 1.ª Nacional feminina
Balonmán	1.ª División masculina e División de Honra Prata feminina
Béisbol	Liga Nacional de Béisbol División de Honra Prata
Fútbol	División de Honra xuvenil
Fútbol sala	3.ª División Nacional masculina/División de Honra xuvenil
Hóckey sobre patíns	OK Liga Bronce feminina e masculina
Sóftbol	Liga Nacional de Sóftbol División de Honra Prata
Rugby	División de Honra B feminina e masculina
Voleibol	1.ª División feminina e masculina
Wáter-polo	1.ª División Nacional masculina e feminina

- Competicións de nivel 2:
  - Modalidades deportivas nas que a competición de categoría absoluta ou sénior se establece en formato de liga por equipos (con 4 ou menos deportistas no espazo de competición).
  - Con ascensos e descensos de nivel segundo o regulamento de competición.

Nivel 2-A	
Atletismo	Liga de Clubs de Primeira División feminina e masculina
Bádminton	Primeira Ouro/Primeira Prata



Billar	División de Honra
<i>Bowling</i>	División de Honra feminina e masculina
Esgrima	División de Ouro (espada, sable ou florete)
Tenis	Campionato de España de Tenis Absoluto por Equipos, 1.ª categoría
Tenis de mesa	División de Honra feminina e masculina
Ximnasia	1.ª División da Liga Iberdrola GR e 2.ª División da Liga Iberdrola GR

Nivel 2-B	
Bádminton	Primeira Bronce
Billar	1.ª División
<i>Bowling</i>	1.ª División masculina
Esgrima	División de Prata (espada, sable ou florete)
Orientación	1.ª División de Orientación a Pé
Tenis	Campionato de España de Tenis Absoluto por Equipos, 2.ª e 3.ª categoría
Tenis de mesa	1.ª División feminina e masculina
Triatlón/dúatlón	2.ª División da Liga Nacional de Clubs feminina e masculina
Vólei praia	Liga Nacional de Vólei Praia
Ximnasia	3.ª División da Liga Iberdrola GR

- Competicións de nivel 3:

- Modalidades deportivas nas que a competición de categoría absoluta ou sénior se establece en formato de clasificación final individual ou por equipos.
- Incluídas nun calendario oficial da tempada da que resulte a clasificación final.

(\*As entidades deberán acreditar unha participación mínima)

Nivel 3-A	
Ciclismo	Copa de España en Ruta, categorías elite e sub-23 (deberase acreditar a participación nun mínimo de 5 probas puntuables da Copa de España 2026. A certificación terá que asinala a Real Federación Española de Ciclismo).



Nivel 3-B	
Ciclismo	<p>Elite e sub-23 na modalidade de estrada, BTT ou ciclocrós (deberase acreditar a alta do equipo elite e sub-23 na Real Federación Española de Ciclismo, participar nun mínimo de 5 probas puntuables no calendario estatal, das cales tres delas deben ser fóra da comunidade autónoma galega).</p> <p>* Non se terá en conta as probas que non figuren na clasificación publicada da Real Federación Española para esas categorías.</p> <p>* A certificación presentarse no momento da xustificación e terá que asinala a federación.</p>
Outras modalidades deportivas	<p>O resto de clubs deberán acreditar a súa participación con 3 deportistas en categoría absoluta nun mínimo de 5 competicións de ámbito estatal ou internacional fóra da comunidade autónoma galega incluídas no devandito calendario.</p> <p>* A certificación presentarse no momento da xustificación e terá que asinala a federación correspondente.</p>

Estas competicións deberán estar incluídas nos calendarios oficiais aprobados polas diferentes federacións para a tempada 2025-2026 ou 2026.

Poderanse incorporar novas modalidades e competicións nacionais. O servizo instrutor realizará as comprobacións necesarias para certificar o ámbito da competición coa federación correspondente e determinará o grupo e nivel que lle corresponda. En caso de que unha competición cambie o seu nome, isto non implicará unha modificación das bases; considerarase que o nome reflectido nelas segue sendo válido para esa competición.

#### **Sexta. Gastos subvencionables**

Consideraranse gastos subvencionables aqueles que de maneira indubidable respondan á natureza da actividade subvencionada, resulten estritamente necesarios e se realicen durante o período correspondente á tempada 2025-2026, no caso de que esta fose partida, ou 2026, no caso de tempada anual.

Para os efectos destas bases subvencionaranse os seguintes gastos de participación e adestramentos dos equipos e das e dos deportistas do club en competicións oficiais organizadas polas federacións correspondentes, que son os seguintes:



- **Gastos federativos.** Os que correspondan a gastos emitidos polas federacións deportivas ou similares para a actividade subvencionada (licenzas, arbitaxes, inscricións...).
- **Gastos de competición e adestramento.** Os correspondentes a desprazamentos, aloxamento, manutención, participación, alugueiro de instalacións deportivas, quilometraxe ou calquera outro necesario para asistir ou participar nas competicións ou adestramentos da actividade deportiva subvencionada.
- **Gastos de persoal.** Os que correspondan a soldos, salarios ou retribucións unicamente das e dos deportistas, técnicos, adestradores ou calquera outro axente necesario para a práctica da actividade deportiva subvencionada.
- **Gasto de material deportivo.** Os que correspondan a vestimenta e equipamento deportivo non inventariable, así como a reparación e mantemento do material de deporte necesario para a práctica subvencionada.
- **Gastos sanitarios.** Os relacionados coa saúde das e dos deportistas no desenvolvemento da actividade deportiva subvencionada.

#### Outras normas para ter en conta

- Quedan excluídos, entre outros, os gastos derivados de seguros, asesorías, telefonía, ITV, así como calquera outro que non teña relación coa práctica da actividade deportiva subvencionada.
- En ningún caso se admitirán gastos cuxos prezos sexan superiores aos de mercado.
- Salvo disposición expresa en contrario, poderase considerar como gasto subvencionable o gasto feito e xustificado, aínda que non estea pagado, antes da presentación da xustificación, sempre que se pague no prazo máximo dun mes desde que se lle aboe a subvención á persoa beneficiaria. Este aspecto comprobarase cando se faga o control financeiro.
- Non se considerarán como subvencionables os gastos de máis de novecentos euros (900 €) euros que non se aboen por medio dunha entidade financeira. Así mesmo, cando se trate de persoas beneficiarias que non contén con contabilidade, tampouco se considerarán subvencionables os gastos que non se paguen por medio de entidade financeira.
- En caso de que se subvencionen actividades non profesionais, servirá de xustificante o recibo no que se acredite a identificación da persoa beneficiaria da subvención e do



suxeito que desempeña a actividade, o concepto, a data, o importe e o xustificante de que se realizou, se procede, a correspondente retención fiscal.

- En caso de compensacións por desprazamentos en vehículos privados, estableceranse sobre a base das tarifas aboadas por quilómetro de acordo coa normativa vixente.

#### **Sétima. Lugar de presentación de solicitudes**

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido no artigo 14.2 da LPACAP.

Soamente se admitirá unha solicitude de subvención por cada entidade solicitante.

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, de acordo co establecido no artigo 14.2 da LPACAP.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

#### **Oitava. Prazo de presentación de solicitudes**

O prazo de presentación de solicitudes será de vinte (20) días hábiles, contados a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).

#### **Novena. Comprobación de datos**

Para tramitar este procedemento consultarase automaticamente os datos incluídos nos documentos elaborados polas administracións públicas que se detallan a continuación:

- NIF das persoas xurídicas solicitantes.
- DNI ou NIE da persoa representante legal do club ou entidade.
- Domicilio fiscal da entidade solicitante.



- Certificado de estar ao corrente das obrigas tributarias coa Axencia Estatal de Administración Tributaria (AEAT), coa Axencia Tributaria de Galicia (ATRIGA), coa Seguridade Social e coa Deputación de Pontevedra.

En caso de que as persoas interesadas se opuxesen ás devanditas consultas deberán indicalo marcando o cadro habilitado no formulario de inicio e achegar os documentos correspondentes.

No suposto de imposibilidade material de obter o documento, o órgano competente poderá requirirle á persoa interesada a súa presentación ou, no seu defecto, a acreditación por outros medios dos requisitos aos que se refire o documento antes de formular a proposta de resolución.

#### Décima. Documentación

As entidades solicitantes presentarán, xunto coa solicitude, a seguinte documentación:

- **Certificado federativo (anexo I).** Certificación oficial expedida pola federación correspondente na que se detallen os criterios de valoración específicos e previstos nas bases.
  - Aqueles clubs de modalidades deportivas que desenvolvan a súa actividade competitiva no ano natural poderán presentar, xunto coa solicitude, unha declaración xurada na que se detallen os criterios de valoración específicos e previstos nas bases. En todo caso, deberán presentar o certificado federativo no prazo de dez (10) días desde a notificación da proposta de resolución provisional. En caso de presentar un menor número de licenzas, reducirase o importe da subvención proporcionalmente (en caso de presentar máis licenzas, terase en conta as declaradas coa solicitude).

A documentación complementaria deberase presentar electronicamente. As persoas interesadas responsabilizaranse da veracidade dos documentos que acheguen. Excepcionalmente, a Administración poderá requirir a exhibición do documento orixinal para cotexalo coa copia electrónica presentada.



Se algunha das persoas interesadas presentase a documentación complementaria presencialmente, requiriráselle que a emende a través da súa presentación electrónica. Para este efecto considerárase como data de presentación aquela na que se realizase a emenda.

#### **Décimo primeira. Trámites administrativos posteriores á presentación de solicitudes e emenda destas**

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráse que, se non o fai, se entenderá que desiste da súa solicitude, que se arquivará sen máis trámites.

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian empregar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial, segundo a normativa reguladora do procedemento do que se trate. No formulario deberá indicarse, no seu caso, o procedemento para o que se está a efectuar o trámite. Os modelos están dispoñibles en

<https://sede.depo.gal/web/public/dynamic/catalogo/tramitesxenericos>

#### **Décimo segunda. Notificacións**

As notificacións de resolucións e actos administrativos realizaranse só por medios electrónicos, nos termos previstos na normativa reguladora do procedemento administrativo común; estas



practicaranse a través da Dirección Electrónica Habilitada única, accesible desde <https://sede.depo.gal> e <https://dehu.redsara.es>.

As notificacións entenderanse practicadas no momento no que se acceda ao seu contido e rexeitadas cando transcorran dez (10) días naturais desde a posta á disposición da notificación sen que se acceda a este.

O sistema remitiralles ás persoas interesadas avisos da posta á disposición das notificacións á conta de correo electrónico indicada na solicitude. Estes avisos non terán en ningún caso efectos de notificación practicada e a súa falta non impedirá que a notificación sexa considerada plenamente válida.

Se o envío electrónico non fose posible por problemas técnicos, a Deputación de Pontevedra realizará a notificación polos medios previstos na normativa reguladora do procedemento administrativo común.

#### **Décimo terceira. Procedemento de concesión**

O procedemento de concesión das subvencións levarase a cabo en réxime de concorrencia competitiva; é dicir, realizarase comparando as solicitudes presentadas co fin de establecer unha prelación entre elas, de acordo cos criterios de valoración previamente fixados nas bases reguladoras e na convocatoria, e concederánselles co límite fixado nesta, dentro do crédito dispoñible, a aquelas solicitudes que obteñan unha maior puntuación ao aplicar os criterios de valoración.

O importe das subvencións calcularase de acordo cos criterios de valoración recollidos nestas bases.



Establécese un importe máximo de subvención para as diferentes modalidades con base nos grupos e niveis das competicións de acordo coa seguinte clasificación:

Límites	
Competicións de nivel 1 Para os clubs que contan cun segundo equipo de categoría estatal incrementárase o límite establecido en 5.000 €.	Nivel 1-A.....38.000 €
	Nivel 1-B.....28.000 €
	Nivel 1-C.....18.000 €
Competicións de nivel 2	Nivel 2-A.....18.000 €
	Nivel 2-B.....13.000 €
Competicións de nivel 3	Nivel 3-A.....18.000 €
	Nivel 3-B.....13.000 €

En todo caso, as axudas non poderán superar o 40 % do orzamento presentado polas entidades coa solicitude.

Se ao facer o primeiro repartimento quedase diñeiro dispoñible, realizaranse tantas reparticións como fose necesario, seguindo o mesmo procedemento.

#### **Décimo cuarta. Criterios de valoración e cálculo do importe das subvencións**

Co obxecto de garantir unha valoración obxectiva para calcular os importes, estableceranse os criterios do orzamento achegado coa solicitude e o certificado federativo (anexo I), de acordo coa seguinte ponderación:

<b>Criterios de valoración específicos</b>	<b>Ponderación</b>
Orzamento da finalidade subvencionada	50 %
Licenzas federativas	50 %
Total	100 %



- Determinación dos puntos:

O procedemento para determinar os puntos acadados por cada entidade determinarase coa seguinte fórmula:

$$\text{Puntos de cada entidade} = (\text{Orz} * 50 / \text{Sto}) + (\text{Lf} * 50 / \text{Slf})$$

Orz.: orzamento presentado

Sto.: sumatorio total de orzamentos presentados

Lf.: puntuación acadada polo club polas licenzas federativas do certificado federativo presentado

Slf.: sumatorio das puntuacións totais do acadado polos clubs polas licenzas federativas

- Cálculo da puntuación a través das licenzas federativas:

Licenzas totais da entidade	1 punto/licenza
Licenzas formativas (categorías de base ata os 16 anos)	1 punto/licenza
Licenzas femininas	1 punto/licenza
Licenzas de deporte adaptado	10 puntos/licenza
Licenzas de técnicos ou adestradores*:	
➤ Nivel 3	5 puntos/licenza
➤ Nivel 2	3 puntos/licenza
➤ Nivel 1	1 punto/licenza
Licenzas de técnicas ou adestradoras*:	
➤ Nivel 3	7 puntos/licenza
➤ Nivel 2	5 puntos/licenza
➤ Nivel 1	3 puntos/licenza
Licenzas das e dos deportistas estatais:	
➤ Competicións de nivel 1-A	600 puntos/licenza
➤ Competicións de nivel 1-B	500 puntos/licenza
➤ Competicións de nivel 1-C	400 puntos/licenza
➤ Competicións de nivel 2-A	200 puntos/licenza
➤ Competicións de nivel 2-B	100 puntos/licenza
➤ Competicións de nivel 3-A	300 puntos/licenza
➤ Competicións de nivel 3-B	100 puntos/licenza



- Cálculo do valor do punto das axudas das subvencións:

Este valor calcúlase dividindo o orzamento total destinado á convocatoria entre 100.

- Cálculo do importe das subvencións:

O importe final das subvencións calcularase multiplicando a puntuación acadada por cada entidade polo valor do punto das axudas.

\* As licenzas de adestradoras e adestradores certificadas pola federación serán as licenzas correspondentes aos títulos oficiais de adestradora ou adestrador impartidos polas federacións deportivas (autonómicas ou estatais) ou polos diferentes centros de ensinanza deportiva de réxime especial.

#### **Décimo quinta. Instrución do procedemento**

A instrución do procedemento de concesión de subvencións correspóndelle ao Servizo de Deportes.

Comprenderá as seguintes fases:

- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- Informe-proposta da xefatura do servizo no que figure a valoración das solicitudes, de acordo cos criterios de concesión, se explique o sistema de valoración seguido, se relacionen as solicitudes por orde e se sinale a subvención correspondente a cada unha delas. Así mesmo, relacionaranse as solicitudes desestimadas e explicaranse as razóns da súa desestimación.
- Fiscalización dos expedientes por parte da Intervención.
- Informe-proposta por parte da Comisión de Valoración, que estará composta por:
  - Presidente: a xefa ou o xefe do Servizo de Deportes.
  - Vogal: un membro do persoal técnico do Servizo de Deportes.



- Secretaria ou secretario: unha funcionaria ou funcionario do Servizo de Deportes.
- Proposta de resolución provisional: o órgano instrutor, á vista dos expedientes e do informe-proposta, formulará unha proposta de resolución provisional debidamente motivada, que será notificada coa súa publicación na Sede electrónica da Deputación de Pontevedra, e establecerase un período de dez (10) días naturais desde o mesmo día da súa publicación para presentar alegacións ou renunciar á subvención proposta. En caso de non haber modificacións, elevarase a definitiva.
- Informe-proposta dos expedientes que presenten alegacións ou renuncias.
- Proposta de resolución definitiva: logo de examinadas as alegacións e as posibles renuncias, formularase a proposta de resolución definitiva, que deberá incluír a persoa ou persoas para as que se propón a concesión da subvención e a súa contía. Tamén recollerá as solicitudes rexeitadas e os motivos de exclusión.  
As propostas de resolución provisional e definitiva non crean dereito ningún a favor da persoa beneficiaria proposta fronte á Administración mentres non se lle notifique a resolución de concesión.
- Informe de fiscalización da Intervención de todos os expedientes e da proposta de resolución definitiva.

#### **Décimo sexta. Resolución do procedemento**

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución publicarase no BOPPO e terá os efectos dunha notificación, por tratarse dun procedemento de concorrencia competitiva (artigo 45 da LPACAP).

Así mesmo, serán igualmente obxecto de publicidade a través da páxina web da Deputación de Pontevedra.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte ao de finalización do prazo de presentación das solicitudes. O vencemento do prazo máximo sen notificar a resolución lexítima as persoas interesadas para entender como desestimada por silencio administrativo a solicitude de concesión da subvención.



### Décimo sétima. Compatibilidade e incompatibilidade

A subvención será compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados.

Estarase ao disposto no artigo 19.3 da LXS e no 17.3 da LSG, no que se indica que “o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada”.

A subvención será incompatible con calquera outra para a mesma persoa beneficiaria e a mesma finalidade con cargo a créditos desta Deputación e dos seus organismos dependentes, en especial, coas convocatorias de subvencións a clubs deportivos da provincia de Pontevedra de ámbito inferior ao estatal, ás de ámbito náutico e ás consignadas nominativamente no Orzamento para o ano 2026 da Deputación de Pontevedra.

### Décimo oitava. Procedemento de xustificación e pagamento

As entidades beneficiarias das subvencións deberán xustificar o cumprimento da finalidade para a que se concedeu a axuda.

O prazo de presentación das xustificacións finalizará o 31 de xaneiro de 2027.

As entidades beneficiarias deberán presentar a xustificación obrigatoriamente por medios electrónicos segundo o previsto na base décimo terceira destas bases.

Para a xustificación as entidades beneficiarias deberán presentar a seguinte documentación:

- **Anexo II. Conta xustificativa de gastos e ingresos**

Na xustificación de gastos relacionaranse os conceptos por un importe igual ou superior ao orzamento presentado coa solicitude.

- En caso de que se xustifiquen gastos por un importe igual ou superior ao do orzamento presentado, aboarase a totalidade da subvención.
- En caso de que se xustifiquen gastos inferiores ao 100 % e igual ou superiores ao 50 % do orzamento presentado, aboarase a parte proporcional da subvención.



- En caso de que se xustificuen gastos inferiores ao 50 % do orzamento presentado, non se considerará cumprida a finalidade básica da subvención, polo que non se aboará cantidade ningunha.
- Na conta xustificativa especificaranse as facturas presentadas para xustificar a subvención concedida, e declararase que esas facturas non se utilizaron para xustificar outras subvencións.
- En caso de necesitar relacionar máis facturas, utilizarase o documento de continuación da conta xustificativa (anexo III).

Na xustificación de ingresos relacionaranse as axudas concedidas por outros organismos públicos para a finalidade subvencionada e declararase que o importe das subvencións concedidas por outros organismos públicos e os fondos propios ou privados para a actividade subvencionada non superaron o importe total dos gastos para a dita actividade.

En caso de que coa suma da subvención concedida e dos ingresos doutras subvencións ou axudas os clubs superasen o custo da finalidade subvencionada ou obtivesen beneficios, aboarase a parte proporcional da subvención para que non se supere o custo da actividade subvencionada.

- **Xustificación con facturas**

As entidades beneficiarias presentarán facturas ou documentos análogos con valor probatorio no ámbito mercantil e administrativo polo importe da subvención concedida.

- **Anexo IV. Memoria de difusión**

Memoria na que se xustifiquen as medidas de publicidade e difusión da subvención, por medio de fotografías que mostren de forma clara e inequívoca cada unha das actuacións requiridas.

- En caso de que as entidades non xustificasen correctamente as medidas de publicidade e difusión, o Servizo de Deportes poderá establecer unha dedución de ata o 10 % sobre o importe da subvención. Para a imposición destas deducións non fará falta tramitar un procedemento especial distinto ao da xustificación da subvención; o pago da subvención farase descontando o importe da dedución do importe concedido.
- A falta de xustificación total das medidas de difusión dará lugar á perda total do dereito ao cobro da subvención.



- **Anexo V. Desprazamentos**

Nas modalidades deportivas nas que os equipos deban cumprir un mínimo de campionatos, estes terán que presentar este anexo asinado pola federación correspondente.

A falta de xustificación dará lugar á perda total do dereito ao cobro da subvención. Excepcionalmente, e debido a unha situación extraordinaria de suspensións dos calendarios de competicións que imposibilite que a entidade complete os mínimos requiridos, a Deputación de Pontevedra poderá modificar os mínimos exixidos. As entidades deberán achegar xunto coa xustificación un certificado federativo no que se indique a suspensión ou o aprazamento das competicións e o motivo.

Outras normas que se deben ter en conta na xustificación:

- Os gastos presentados na conta xustificativa deben estar aboados ás súas respectivas provedoras e provedores antes de presentar a xustificación da subvención. En caso de que o club non dispoña de fondos nese momento, terá un prazo máximo dun (1) mes desde que perciba a subvención para efectuar eses pagos. Se posteriormente, mediante control financeiro, se comprobase que algún dos gastos non se aboou ou se fixo fóra de prazo, este deixará de ser subvencionable.
- As entidades beneficiarias das subvencións provinciais deben empregar, con carácter xeral, formas de pago a terceiras persoas que poidan acreditarse mediante un documento expedido por unha entidade financeira no que queden identificados a ou o beneficiario, o importe e a data de aboamento (tarxetas bancarias de crédito ou débito, talóns nominativos, transferencias bancarias etc.), e só excepcionalmente poderá empregarse o pago en metálico cando non sexa posible outra forma alternativa. O incumprimento desta disposición para algún gasto que supere o importe de novecentos euros (900 €) implicará que este se considere non subvencionable.
- En caso de clubs que non teñan contabilidade, os gastos que non se aboen mediante unha entidade financeira non se considerarán subvencionables.
- Unha vez vencido o prazo de xustificación sinalado nestas bases ou, no seu caso, o establecido na prórroga sen que a entidade beneficiaria presente a documentación



xustificativa, o Servizo de Deportes requiriralle que o faga no prazo improrrogable de quince (15) días. Pasado este prazo sen que a entidade interesada atenda o requirimento, entenderase que renuncia á subvención e dítase a resolución de perda do dereito ao cobro, que se lle notificará á dita entidade.

O pagamento das subvencións farase unha vez aprobada a xustificación, mediante transferencia bancaria á conta sinalada na solicitude, que deberá estar a nome da entidade beneficiaria.

Para cobrar a subvención, os clubs deberán estar ao corrente das súas obrigas tributarias coa AEAT, coa ATRIGA, coa Seguridade Social e coa Deputación de Pontevedra.

### **Décimo novena. Obrigas en materia de publicidade e deducións por incumprimento**

As entidades beneficiarias destas axudas deben levar a cabo as seguintes actuacións en materia de difusión e publicidade para cumprir coas condicións establecidas. O incumprimento destas medidas podería establecer deducións dunha porcentaxe da subvención concedida, segundo se detalla a continuación:

1. Roupa e equipamento de competición ou adestramento (dedución máxima do 5 % en caso de incumprimento):

Tamaño do logo	Clubs con subvención > 5.000 €	Clubs con subvención ≤ 5.000 €	Dedución por incumprimento
Roupa de competición	Mínimo 20 x 5 cm	Deberá ser visible	- Se non ten logo, un 3 % - Se non cumpre a medida, un 1 %
Roupa de adestramento/viaxe	Deberá ser visible	Opcional	- Se non ten logo, un 1 %
Roupa de competición do resto dos equipos	Deberá ser visible	Opcional	- Se non ten logo, un 1 %

2. Espazos físicos e dixitais (dedución máxima do 5 % en caso de incumprimento):
  - Clubs con espazo de xogo: os clubs que dispoñan de espazos de xogos (pavillóns, pistas, piscinas etc.) deberán colocar un mínimo de lonas publicitarias nas súas instalacións en lugares estratéxicos que aseguren a súa visibilidade durante os eventos e adestramentos. Ademais, deberán garantir a presenza dixital do patrocinador na páxina web e nas redes sociais oficiais do club.



Espazos físicos e dixitais	Clubs con subvención > 5.000 €	Clubs con subvención ≤ 5.000 €	Dedución por incumprimento
Lonas publicitarias	Mínimo de 4 lonas de 3 x 1	Mínimo de 2 lonas 3 x 1	- Por cada lona que non estea colocada, un 1 %
Páxina web ou redes sociais	Deberá estar na páxina web ou redes sociais	Deberá estar na páxina web ou redes sociais	- Se non está, un 1 %

- Clubs sen espazo de xogo: para os deportes que non contan cun espazo de competición específico (como ciclismo etc.), a publicidade debe asegurarse mediante a visibilidade dixital (na páxina web e redes sociais do club) e a colocación do logo nos vehículos do club.

Espazos dixitais e vehículos	Clubs con subvención > 5.000 €	Clubs con subvención ≤ 5.000 €	Dedución por incumprimento
Páxina web ou redes sociais	Deberá estar na páxina web ou redes sociais	Deberá estar na páxina web ou redes sociais	- Se non está, un 2,5 %
Vehículos do club	Deberá ser visible	Deberá ser visible	- Se non está, un 2,5 %

No caso de incumprimento das medidas publicitarias establecidas, os clubs deberán presentar unha xustificación detallada que explique as razóns do incumprimento. Esta xustificación será avaliada pola entidade subvencionadora e poderá dar lugar a unha revisión da subvención. Así mesmo, se os clubs levan a cabo outras accións publicitarias adicionais non contempladas nestas bases, deberán garantir que a Deputación, do mesmo xeito que outras administracións públicas que participen, sexan incluídas nas devanditas accións publicitarias, respectando sempre o principio de proporcionalidade en función da achega de cada Administración.

Para as subvencións de menos de mil cincocentos euros (1.500 €) só se terán que xustificar a difusión por medio dun dos apartados antes citados.

Todos os gastos derivados da produción dos elementos publicitarios mencionados correrán a cargo da entidade subvencionada, que se compromete a actualizar todos estes soportes publicitarios antes de presentar a xustificación.

De non incluír a imaxe da Deputación de Pontevedra nos termos establecidos, debido ás características da modalidade deportiva ou de calquera outra circunstancia, deberase propoñer unha alternativa, que será estudada polo Servizo de Deportes, para posteriormente propoñer a súa aprobación ou unha dedución da subvención.



A Deputación de Pontevedra poñerá á disposición das entidades subvencionadas os logotipos oficiais da imaxe corporativa en [www.depo.gal](http://www.depo.gal) (área de descargas).

As entidades solicitantes deberán ter en conta para futuras actuacións estas medidas de difusión á hora de deseñar novos equipamentos ou calquera outra medida.

#### **Vixésima. Obrigas das entidades beneficiarias**

Ademais das previstas no artigo 14 da LXS, as entidades beneficiarias terán que cumprir o seguinte:

- As medidas de publicidade e difusión nos termos regulamentariamente establecidos nestas bases.
- Os demais supostos previstos nesta normativa reguladora das subvencións.
- As entidades beneficiarias deberán aprobar a liquidación da tempada. O acordo deberá ser aprobado pola asemblea ou órgano competente da entidade deportiva e indicarse de xeito expreso no acordo, e con carácter mínimo, o importe total dos gastos, o importe total de ingresos e o resultado da tempada. Ao abeiro do disposto no artigo 56 da LXS, o incumprimento desta obriga formal será considerado como infracción leve; esta comprobación realizarase posteriormente no caso dun control financeiro.

#### **Vixésimo primeira. Reintegro ou perda do dereito ao cobro da subvención**

As subvencións concedidas deberanse reintegrar cando as causas sexan posteriores ao pagamento destas.

Perderase o dereito a cobrar a subvención, total ou parcialmente, no suposto de falta de xustificación ou de concorrencia dalgunha das causas previstas na lexislación de subvencións e, en concreto, nos seguintes supostos:

- Por incumprir as obrigas establecidas con motivo da concesión da subvención.
- Por incumprir as obrigas de xustificación.
- Por incumprir as obrigas de adoptar medidas de difusión do financiamento público recibido.
- Polas demais causas establecidas na normativa de subvencións.



### **Vixésimo segunda. Control financeiro**

A entidade beneficiaria, de acordo co establecido nos apartados 5 e 6 do artigo 31 da Ordenanza xeral de subvencións da Deputación, publicada no BOPPO núm. 249, de 30 de decembro de 2016, estará suxeita ao control financeiro que se poida exercer, no prazo de catro (4) anos, contados desde o pagamento da subvención, e indicaráselle que, en caso de non ter contabilidade fiable, só serán subvencionables os gastos que se poidan acreditar mediante extractos bancarios (independentemente do importe destes).

O control financeiro fará referencia a todos os gastos e ingresos da actividade subvencionada, que deberá integrar a totalidade de gastos finais resultantes dos gastos subvencionables presentados coa solicitude, así como o resto de gastos que a entidade estime imputables á tempada (posibles gastos que non se reflicten na solicitude).

Esta contabilidade deberá estar reflectida nos libros contables co total de gastos e de ingresos; en caso de ser positiva, a entidade deberá reintegrar o importe resultante, conforme a lexislación vixente, na que se indica que o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

É importante determinar o inicio e a finalización da tempada e os gastos e ingresos que se lle imputan, especialmente en caso de que existan outras actividades complementarias, compatibles co seu obxecto social, de carácter industrial, comercial ou de servizos, e destinar os seus bens ou recursos a estes obxectivos (como poden ser escolas deportivas, eventos, campus deportivos...). Estas actividades deberán reflectirse nos libros contables de maneira independente e, en caso de que a entidade presentase un balance anual positivo, debe quedar reflectido a que actividade se lle imputa ese superávit.

### **Vixésimo terceira. Órgano de aprobación**

De acordo co establecido na base 16.2 das Bases de execución do Orzamento para o ano 2026 e cumprindo co establecido no artigo 18 da LXS, o órgano competente para aprobar estas bases é a Xunta de Goberno.



#### **Vixésimo cuarta. Dereito supletorio**

Para o non disposto nestas bases contemplárase o establecido no artigo 4 da Ordenanza xeral de subvencións da Deputación de Pontevedra.

#### **Vixésimo quinta. Publicidade da convocatoria**

Estas bases reguladoras publicaranse no BOPPO e en <https://sede.depo.gal>.

Por outra banda, de conformidade co previsto nos artigos 17.3.b e 20.8.a da LXS, remitiráselle o texto da convocatoria á BDNS para a súa publicación nela, que será a que lle dea traslado do seu extracto ao BOPPO.

#### **Vixésimo sexta. Protección de datos**

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado "Normativa aplicable", dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

